

Broj: IP-01-29-1/24

Datum: 15.08.2024. godine

Na osnovu člana 13. Statuta Lokalne fondacije Zenica, predsjednica Upravnog odbora na sjednici održanoj u Zenici dana 15.08.2024. godine donosi

## **POLITIKE SPRJEČAVANJA KORUPCIJE**

### **I UVOD**

Korupcija je ozbiljan problem u savremenom svijetu, a posebno u Bosni i Hercegovini, imajući u vidu da smo država u tranziciji u kojoj demokratski, institucionalni i vrijednosni sistemi nisu još dovoljno izgrađeni.

Svi oblici korupcije imaju negativan uticaj na pravnu sigurnost i demokraciju. Korupcija, uvijek stvara negativne učinke, tako da je, sa aspekta društvene perspektive, vrlo nepovoljna. Siromašni ljudi su posebno pogođeni korupcijom, jer ona dovodi do stanja ograničenog pristupa osnovnim javnim uslugama. Stoga, korupcija predstavlja prijetnju demokratskim procesima i borbi protiv siromaštva i plodno je tlo za sve vrste konflikata i kršenje ljudskih prava. Iz ovih razloga, suzbijanje korupcije unutar Lokalne fondacije Zenica (u daljem tekstu Fondacija) nije samo garancija da se donatorska sredstva koriste na pravi način, nego predstavlja i važan segment svih njenih aktivnosti, kako bi dala doprinos u promovisanju poštivanja zakonskih propisa, demokratije, borbe protiv siromaštva i poboljšanja opšteg stanja sigurnosti u Bosni i Hercegovini.

### **II SVRHA**

Ovom politikom antikorupcije (u daljem tekstu „Politika“), Fondacija želi unaprijediti kvalitet svoga rada, spriječiti i prevenirati korupciju u bilo kom njenom obliku i u svim segmentima poslovanja Fondacije.

Ova Politika se odnosi na cjelokupno poslovanje Fondacije i važi za sva lica koja su uključena u njeno poslovanje, uključujući članove Upravnog odbora, uposlenike,

saradnike, volontere, te donatore Fondacije, koji su obavezni da na odgovoran, lojalan, savjestan i pošten način djeluju u Fondaciji i isključivo za njenu dobrobit.

### III DEFINISANJE POJMOVA

**Korupcija** se definiše kao zloupotreba ovlaštenja radi sticanja privatne koristi. Unutar Fondacije, korupcijom će se smatrati svaka zloupotreba sredstava i ovlaštenja kako bi se pridobila lična korist, bilo da je ona finansijske ili nefinansijske prirode. Korupcija predstavlja krivično djelo koje uključuje pronevjeru, krivotvorenje, podmićivanje, te nepotizam.

**Pronevjera** predstavlja krivično djelo kada neka osoba protupravno prisvaja novac ili druge pokretne stvari koje su joj u službi povjerene.

**Krivotvorenje** predstavlja krivično djelo kada neka osoba vrši prepravljavanje dokumenata i lažno prikazivanje stvarnog stanja finansijskih tokova ili drugih operacija, s namjerom obmane.

**Podmićivanje** predstavlja davanje mita državnom službeniku ili bilo kojoj drugoj osobi u nakani sticanja prednosti za sebe ili neku treću osobu. Podmićivanje može biti aktivno (dodjeljivanje prednosti) i pasivno (prihvatanje prednosti) u zamjenu za protuzakonitu uslugu.

**Nepotizam** je način ponašanja neke osobe koja na osnovu svog povlašćenog položaja u hijerarhiji države ili organizacije, favorizira članove svoje porodice ili prijatelje u odnosu na druge osobe, bez obzira na njihovu stručnu sposobnost kod zapošljavanja, davanja poslova ili dodjeljivanja nekih beneficija.

### IV AKTIVNOSTI KOJE SE SMATRAJU KORUPCIJOM

Pod krivičnim djelima koja su usko vezana za korupciju, a koja su nominovana u Krivičnom zakonu Federacije Bosne i Hercegovine, i koja se mogu vezati za djelatnost Fondacije, podrazumijeva se:

- Zloupotreba ovlasti u poslovanju;
- Izrada lažne bilanse;
- Prijevarama u poslovanju;
- Sklapanje štetnog ugovora;
- Odavanje i neovlašćeno pribavljanje poslovne tajne;
- Krivotvorenje znakova za vrijednost;
- Krivotvorenje ili uništenje poslovnih isprava;
- Zloupotreba čeka i kartice;
- Pranje novca;

- Porezna utaja;
- Lažna porezna isprava;
- Primanje i davanje dara i drugih oblika koristi;
- Protuzakonito posredovanje;
- Zloupotreba položaja ili ovlašćenja;
- Pronevjera u službi;
- Prijevara u službi.

## V PREVENCIJA I SPRJEČAVANJE KORUPCIJE

Samim donošenjem ove Politike, Upravni odbor Fondacije podiže nivo povjerenja i reputacije Fondacije u smislu njene odgovornosti i transparentnosti, na internom i eksternom nivou.

U skladu sa ovom Politikom, Fondacija će kontinuirano raditi na razvijanju internih mehanizama za otklanjanje mogućnosti za situacije koje dovode do ili direktno predstavljaju korupciju.

S tim u vezi, Fondacija je već poduzela mjere i aktivnosti kojima se žele spriječiti i/ili smanjiti direktni i indirektni uzroci koruptivnih ponašanja, kao što su:

- Donošenjem kodeksa ponašanja, za članove Upravnog odbora, osoblje i članove Komisija, želi se izgraditi jasan etički pristup u radu i prezentovanju rada Fondacije od strane navedenih lica. Donošenje Politike sukoba interesa kako bi se spriječio najprije nepotizam, ali i korupcija;
- Donošenje Pravilnika o finansijskom poslovanju u skladu sa zakonskom legislativom;
- Provođenje interne revizije i nadzora u finansijskom i programskom poslovanju;
- Provođenje eksterne revizije poslovanja u skladu sa mogućnostima organizacije;
- Jačanje povjerenja unutar Fondacije kroz donošenje Pravilnika o radu kojim se uređuje upravljanje ljudskim resursima na način koji podržava jednake mogućnosti za sve;
- Jačanje transparentnosti i povjerenja prema zajednici kroz objavljivanje godišnjih izvještaja o radu;
- Uključivanje korisnika i članova zajednice u različite oblike djelovanja (komsije, sastanci, evaluacije, monitoringe, planiranja i slično);
- Donošenje jasnih i objektivnih kriterijuma za izbor korisnika usluga i projekata kroz Politiku i Pravilnike o dodjeli grantova.

## VI UPRAVLJANJE SLUČAJEVIMA KORUPCIJE

Upravni odbor i Izvršna direktorica Fondacije su dužni da spriječe i zabrane bilo koji oblik korupcije u Fondaciji.



Svako lice navedeno u tački 2, alineja 2, dužno je da u toku provođenja povjerenih mu/joj dužnosti, prevenira, spriječi i izvjesti odgovorno lice i/ili Upravni odbor Fondacije, usmenim ili pismenim putem, o svim važnim činjenicama koje posjeduje u vezi sa bilo kojim oblikom korupcije i aktivnostima navedenim u tački 4, koje se smatraju koruptivnim.

Upravni odbor i Izvršna direktorica Fondacije će, u skladu sa ovom Politikom, posebnom procedurom utvrditi načine prijave korupcije, zaštitu pojedinaca koji su prijavili korupciju i koji poduzimaju mjere za borbu protiv iste, odgovornosti i podjele zaduženja članova upravljačkih tijela i uposlenika koji učestvuju u prevenciji korupcije.

Ove Politike stupaju na snagu danom usvajanja od strane Odbora i objavljuje se na oglasnoj ploči Fondacije.

U Zenici, dana 15.08.2024. godine

  
\_\_\_\_\_  
Azra Ganić,  
Predsjednica Upravnog odbora

